

佛說呵鵬阿那舍經

卷八

十七

東晉西域沙門竺曇無蘭譯

聞如是一時佛在舍衛國祇陀園呵鵬阿那舍將五百優婆塞至舍利弗所作禮已却坐舍利弗爲說經大歡喜而退復至佛所以頭面著地叉手繞佛三匝却坐佛問呵鵬阿那舍若有何功德教化五百弟子隨侍汝呵鵬阿那舍即長跪叉手言我常奉行佛所說四事何等爲四一者布施於人二者說善語三者占視同學給足有無四者同學者財共不計佛言善哉善哉已過去佛無有過是四事未來佛亦無有過是四事今現在佛亦無有過是四事佛爲呵鵬阿那舍說經已各大歡喜而退呵鵬阿那舍還歸入舍呼諸人客奴婢坐著前好爲說經開解語生死善惡之道

復上殿呼諸持藏人諸妓女著前爲說經戒皆大歡喜復上後殿爲諸夫人婦女說經戒已訖還至正殿齋戒牀上端坐定意便得等心第一天上四王請諸天皆會坐共稱譽呵鵬阿那舍功德天四王中尊王下至呵鵬阿那舍舍面稱譽呵鵬阿那舍功德呵鵬阿那舍時得等心不答天王佛邊有一比丘至呵鵬阿那舍舍呵鵬阿那舍起迎比丘前坐比丘說言佛坐中常相稱譽功德呵鵬阿那舍問比丘言佛稱譽我時邊有白衣無比丘言無有白衣正使有白衣有何等嫌疑耶呵鵬阿那舍言佛語至誠恐白衣不信者便當墮泥犁中正使信佛語者便復來承事我布施我我不喜煩擾於人於是故問耳比丘辭去呵鵬阿那舍言想朝來未食且留飲食便行

澡水下飲食訖比丘還白佛言屬至呵鵬阿
那舍舍道說言佛坐中大相稱譽呵鵬阿那
舍因問我言佛稱譽我時邊有白衣無我言
無白衣正使有白衣有何等嫌疑呵鵬阿那
舍言佛稱譽我實至誠不妄白衣不信佛語
者便當墮泥犁中正使信者便復來承事我
我不喜煩擾他人以是故問耳佛言善哉善
哉我不常爲汝曹說呵鵬阿那舍有七事今
復益一事爲八事何等爲八事一者不求不
欲令人知二者信不欲令人知三者自羞不
欲令人知四者自慙不欲令人知五者精進
不欲令人知六者自觀不欲令人知七者得
禪不欲令人知八者點慧不欲令人知所以
不欲令人知者不欲煩擾於人故不欲令人
知佛說經已諸比丘皆大歡喜起前爲佛作

禮

佛說呵鵬阿那舍經